



萬柳溪邊舊話

知非子尤玘君玉撰 門人張雨書諱

始遷祖贈待制公

諱叔保

自晉江避難入吳往來吳中

諸郡未有定處嘗同王樞密康靖公游浮玉山宿

壯繆侯祠中以卜居求夢夜夢侯手賜錫器器中

書一成字覺以告康靖康靖曰器者器皿也皿上

著一成字是盛字錫者帝常之西南有錫山神明錫

公錫器意者俾公居無錫而子孫盛乎始祖遂領

神意定居錫之許舍山中命子孫世世奉壯繆侯

香火

待制公徒手入吳以正直名世縉紳多厚遇之性最
穎善書尤長方丈扁額字間以繪畫自娛求者必
厚價然後落筆故晚年頗雄于財園亭池館為一
時絕勝

許舍山中祖基乃買江氏敝居而新之者也東偏楠
木廳三間壯偉高敞玉蝶梅四十二樹環遶之待
制公善書書環玉堂三字于梁間後文獻公諱於
紹聖元年畢漸榜登第四十二歲而入玉堂四十

二樹之兆也

事詳居墓志中文獻公生宋
神宗熙寧七年八月朔日

待制公嘗游福勝禪寺少飲即醉午睡一竹榻既覺
有長眉老僧坐其傍告公曰吾居鳳凰山禪定百
年傳先師相氣之法見先生左鼻氣如松右鼻氣
如雲此身後清貴永永留名子孫貴盛罕有其比
但不及親見之耳相與結納而別後果如老僧之
言今公不遷之祠扁雲松堂蓋自定也

許舍山多許氏有修吾先生精于禮樂文獻公師事
之先生即選為長壻愛同諸子公後與修吾長子

少卿公德之同年舉進士又與德之相繼拜司封
郎中人以為奇

許舍山深多虎童男女晝亦不敢出戶待制公憂之
乃命蒼頭拾棟子數十斛預作大繩以棟子置繩
股中埋于山之四圍不四五年棟樹長大如城圍
山中人號為棟城相與出資造四門于四方曉夜
閉虎遂不敢逾城而入山中人德公世世尸祝之
關侯祠凡三易後定築于青楓巖下祠後潭水清澈
可愛另立一方亭對潭扁曰雲留亭題兩邊柱曰

山光悅鳥性潭影空人心皆待制公手筆待制公
奉關侯不異祖先朔望必拜餘日隔三五日必來
灑掃虔揖培灌竹木故竹木比他山麓更森蔚可
愛春秋多游人亦有進關侯香者待制公晚年畏
寒慎于出戶已經一月不入祠一日微雪中肩輿
而來以袖拂侯像之塵侯兩顴若有汗者待制公
以為灑掃之役誤以水及像乃手拭之既乾稍久
復有心甚疑之不覺淚下速歸便卧疾一月而終
正除夜也

上事閩譜
載之更詳

待制公生二子皆洪夫人出也長有終公諱大年二

十四而娶范貞節娶二年而舉子陽秋公諱范貞

節年十九而有終公天貞節水漿不入口哭泣三

日懷陽秋公付少姑徐氏曰姑無子以我子為子

可也徐將問故貞節持夫故佩劍自刎死有司如

例給粟養陽秋公而表其墓少姑待制公妻

有終公母弟無已公諱大生有俠氣鄰右許氏婦與

人私同謀殺夫里宰發其事有司不明置里宰罪

公捐數十金為贖之一夕矚知許婦與私夫同處

於樓公素有勇力乃持刀躍入樓破其戶斬二人

以出出而遇一僧持燈夜歸者雅識公公懼變服

逃於蕩東西僖里子文獻公借蘇州籍薦名淮漕

不第復歸里中明年州薦始登進士

陽秋公與從弟文獻公同年月生公長十日耳以母

范貞節死於劍戒家人不得殺牲人殺者亦不食

人稱為清素道人終其身不忍服紵綺等衣從弟

官日尊得推恩歲以公名進公不應布素食淡自

如年三十而生子贈少師公諱時亨遂與鄒夫人別

居公一生未嘗近二婦也鄒夫人年百有四歲而卒

贈少師公字逢盛號雲耕奉父母有曾參之譽承祖父高貲喜任達傾財結客多樂與賢豪貴人游里有蕭氏者先世皇胄富冠一郡放利行勢則有之未嘗為盜也富為衆怨一邑之人共指湖中為盜一家六十餘人考掠成獄待死時文獻公官尊矣知其冤而不與白公乃傾家產為蕭白之遂以勞瘁年四十有五室耿夫人一慟亦卒公與耿夫人

同年同月生只不同日耳而卒則無不同人咸異之

文獻公二姊皆適葛氏兄弟也二子各生四男皆有文章盛名江左稱葛氏八麀勝仲次仲同登何昌言榜進士後文獻公一科耳師仲正仲繼之亦一時衣冠之盛而其後舉者亦十餘人咸得外家之教

文獻公年二十一歲登哲宗紹聖元年進士以薦試學官高等除教授凡三轉至禮部員外郎權國子

司業遷司封郎進太常卿兼諭德累除國子祭酒
中書舍人給事中久之拜兵部尚書尋知樞密院
事除觀文殿大學士知建康府加少保致仕年八
十五薨贈少師謚文獻

文獻公有抄寫義子平真自孩時即茹素便利可喜
侍公顧指當意公甚愛之真年十九公出重貲取
沙頭王氏女為之妻明年八月十五子時王氏產
一女從左脇下出舉家往視之無不驚愕其脇開
縫三月餘始沒尚有丹線一大條久之可驗所產

女名曰佛奴慧悟異常面貌端麗方五歲舉動如
成人至秋漸不食形體日小一日八月十五子時
其母丹線忽開女便躍入母腹母即痛死公命以
僧家法焚之築小塔於赤石嶺葬焉平真日夜思
妻女不兩月亦死

文獻公末年雖遷居東帶河上世祠猶在許舍山一
日守第人聞祠堂中哭聲甚高明日開戶視之神
主前大銅鑪裂為八塊人以為不祥至八月廿八
日文獻公無疾薨

工部侍郎九龍公諱字少蒙文獻公長子生而右手
六指四歲時尚未能言秋日從母張太夫人往東
門廻溪莊塗遇老僧忽前抱公曰六指禪師其生
於此乎又落富貴劫矣公曰別來安善相對而泣
自此能言其敏慧非人所能及公為姑蘇王寺丞
壻多游胥臺虎丘之間二十八以蘇籍登第甫耆
懸車徙于鵞湖西僖里更號西僖居士再脩覺林
寺時時謝事而游處焉一日在寺忽見老僧復來
而公卒於寺左先祠中

工待公紹興二年第二名進士有文名嘗主管吏部
架閣文字除太學錄兼實錄檢討官擢博士改宗
正簿累官兵部郎官由禮部郎中為太子詹事兼
秘書監權工部侍郎以疾致仕

工待公致仕後徙居鵞湖既創大第復築名園以其
餘力改造覺林寺寺傍創文獻公祠堂五楹自為
之記鑿石樹祠中記曰覺林在吾西僖吾家為檀
越者百年大觀初先文獻公致政歸寺適傾圮廓
而新之予時為童子嘗從先公游寺中寺中僧輒

坐先公啣杯賦詩留連忘返者恒數日比余既冠
假寺以讀僧之坐我酒我者視昔逾密予若將終
身樂焉後釋褐官行在所時偷簿書暇過西湖之
上流憇諸刹恍然覺林舊境也然心之間冗萬萬
矣已念吾大人投紱而歸歸未數年而先公棄世
既葬僧淵來謁請以其旁院五楹奉先公香火即
先公嘗坐而飲者余感其意復出金買田三頃畀
之俾為禱燭費時時展拜先像與僧觴咏翩翩然
少年佳思一旦復也恨先公坐臨其上不能觴咏

如舊日耳聞語淵曰吾再世有德於寺僧爾寺僧
亦奉我先公香火如孫子此誠左右手不可背也
願鐫石壁間示我後人無替先公之志俾寺之或
毀而不能新也僧或散之四方而不能使復也爾
寺僧亦虔祠事世相守無相忘嗟乎一切有為咸
如夢幻夢而覺焉安知覺林之為色邪空邪余之
貪癡乃諄諄於世守淵當警我曰檀越何久不起
矣然余以先公之故不能忘情也聊為之銘銘曰
茫茫苦海有此覺林釋我吏事來聽梵音不同者

道有契者心心之感矣言念昔今在昔先公策杖
茲尋今也何之肖像余臨華鐙明滅青篆浮沉庭
賓啼鳥簾迤遙岑既瞻既拜亦詠亦斟爾賡我酢
滌此塵襟笑回遠社知結牙琴願言永世講誼彌
深我銘示後式也如金

國子公

諱時

資稟神異一目十行嘗舉博學宏詞除

國子監主簿不赴志樂幽寂多從高僧道士游嘗
得王八百井中儲丹如璧如月盡食之徧遊名山
更名道元號浩光道人歷數十年不返人以為死

矣至乾道中年已百餘歲乃一旦還家童顏黑髮
無異少年子孫皆亡獨兩曾孫在侍奉又二十年
無疾化去化五日聞棺中呼人名速開之惟有一
履一玉冠耳公乃工侍公從弟也

邑志
有傳

閩僧普明喜為人相葬地文簡公

諱

父雲耕翁卒普

明為相吳塘山之陽而葬之文簡公廬於墓者三
年其始葬方十月夜見萬燈滿湖叱聲震地文
簡公懼與二三僮僕棲隱喬松之下空中聞曰此
地發福三百年彼人子有何德而畀之速令發去

又聞空中高聲應曰尤時亨累世積德表又純孝之子也空中又曰世德純孝可當此地矣其善護之此紹興十四年秋事也文簡公服闋即登上第祖孫皆尚書至不肖玘凡六世而金紫未絕也邑志詳文簡公生靖康丁未資質絕人五歲能為詩句文獻公曰此天上騏駘吾不如也十歲親授以經蔣偕施垌以神童薦于有司年十五以詞賦為諸士冠毘陵自置郡以來未有舉進士第一人者文簡公二十二歲名冠南宮廷擬狀元因不呈卷秦檜易

以王佐時文獻公尚在

文簡公與朱文公同榜俱有文名名除將作監簿虞允文以史事過三館問孰可為秘書丞者共以文簡名對亟授之張先生拭曰尤君真秘書也及張說入西府公率三館上書悟說補外守台州聲名同前守趙汝愚上得其善政又得其東湖四詩嘉之遂除淮東提舉

太上崩文簡公定號高宗洪邁請易世祖公率顏師魯奏太上親為徽宗子子為祖父為宗失昭穆之

序在天之靈不安邁論遂屈卒如公議
孝宗嘗與文簡公論人才曰如卿才識近世罕有語
宰執曰尤袤甚好前此無一人言何也擢直學士
院公薦陸游不許內制禪冊海內士服其博雅
文簡公造就門生最盛即江南已有千人郡邑後進
無不游公之門如郡邑士胡寶慶鐘李祭酒肅簡
公祥蔣狀元文忠公重珍丁寶謨常任皆公陶鑄
而成者也

韓侂胄以應辦賞直轉橫行文簡公奏侂胄四年間
已轉二十七年合轉之官又欲超授四階是朝廷
官爵專徇侂胄非磨礪之具也詔遂不行
上以疾不省壽皇文簡公上封事千言駕即日過重
華宮都下懽呼

中宮謁家廟官吏推賞者一百七十二人文簡口奏
其濫乞大裁節上嘉納汰其半擢公禮部尚書兼
侍讀陳源姜特立召用人情驚駭公上封事極言
二人之惡不聽時公年七十遂引年歸又八年薨
宋史言年七十終於位誤也

文集可考

文簡公始任揚州泰興令改江陰學官名為將作監簿大宗正丞進祕書丞兼國史院編修官實錄院檢討遷著作郎兼太子侍讀出知台州府除淮東提舉改江東召直祕閣遷江西漕兼知台州府召為敷文閣改江東提刑召為吏部郎官太子侍讀累遷樞密院正兼左諭德進太常少卿權禮部侍郎兼同修國史侍講又兼直學士院中書舍人與祠起知婺州改太平州召為煥章閣待制除給事中兼侍讀擢禮部尚書以政奉大夫致仕贈太師

金紫光祿大夫

文簡公致政歸不居許舍山專居東帶河大第數步即出西關渡梁溪因造圃梁溪之上後有高崗眺望沿溪左種梅右種海棠各數百樹公有瑞鷓鴣詞二首一詠落梅一詠海棠落梅詞云梁溪西畔小橋東落葉紛紛水映空五夜客愁花片裏一年春事角聲中歌殘玉樹人何在舞破山香曲未終卻憶孤山歸醉路馬蹄香雪襯東風海棠詞云兩行芳蕋傍溪陰一笑嫣然抵萬金烈火臨光灼灼

彤霞射水影沉沉曉粧無力臙脂重夜醉方酣酒
暈深定自格高難著句不應工部總無心

文簡公有詩文集

卷五十

臨海公

諱

工侍公子也娶久不育一日游飲鷺湖中

狂風驟發睹一失風覆舟心甚憐惜懸重賞命漁
人往拯之乃常熟州倅汪受任滿携家入京者皆
囊皆失幸一家十一口俱獲生全受甚德公出其
長女以獻時女年二十有二矣亦有姿色公厚實
其行橐而領之又二年而生正平公

諱

梁汪倅女所

產也

正平公好潔雖畜妻妾而不喜近一日間數盥洗手
面不茹葷不飲酒稍聞婦女髮油氣嘔吐不已或
云終身未嘗行人道好焚異香日狎一馴鹿所至
隨之書室中潔不容一塵公必來自仙位中者乎
享年八十八卒無子女以太常博士公

諱

槩次子寺

丞公

諱

為嗣即玘之高祖也

兵部侍郎五湖公

諱

槩初生時全體刺百花鳥雀十歲

時隱隱尚存資極慧倦于誦讀以父蔭入仕仕二

立斃而湖濱大小魚之死者不可以數計湖中漁舟百十皆仰尤氏為衣食者乃召進蟹人問之曰得于湖岸大垂楊下公命僕夫持挿掘之得赤首巨蛇數十蟹之大者以久殮毒氣也兵侍公甚憐朗卿厚葬之而恤其子弟厚賜大韜數千金終身戒不食蟹

兵侍公夫人性嚴卞常苦目疾時發時止發則往往不食海內有名眼藥俱用過不能愈莊定公夫人甚孝其姑姑亦大愛之夏月姑目疾大發最劇幾

欲自投池中莊定公夫人慟哭禱天刺臂血調藥以進姑目即愈歷數十年至大故未嘗復發事詳夫人墓志

自文獻公首出登第工侍公繼之文簡博士廸功莊定科名接武莊定公嘗築圃臨安之西湖花木不繁而瀟灑宋度宗游湖上幸其堂御筆題楹間曰五世三登宰輔奕朝累掌絲綸蓋實錄也朝紳榮之

許舍山中井水多鹹苦人飲澗水夏日常患腹疾兵

侍公夫人曾夢神人與一鐵柱恍惚如金色泉水湧出柱下頃刻數尺因此驚覺以告兵侍公久之歸寧還家幃輿中見山間一柱婉如夢中所睹問女使不見也命僕夫以松椿識之歸告兵侍公召匠鑿之不十尺而泉水湧出甘淡不異二泉鄉人作地溝分注數十井不竭吳丞相名之曰二二泉而為之銘銘曰

拔劍刺山水為之湧折腰拜井泉出隨踵精誠所格無有弗應豈以地靈而誠不勝山深井少飲澗

瘡孕夢神授符濟之泉瑩色清味冽慧泉可夷分注百井汲飲有遺匪世行德神明曷授澤沛萬家來福逾厚泉名二二我豈溢羨勒此銘詞千禩母毀

博士公

諱

字與平文簡公次子淳熙二年進士累官

建康府推官擢左朝奉郎太常博士因性閒雅不樂仕宦帖仕籍十餘年半在告未壯懸車多方外之游母兄兵侍公極富貴聲色之樂公不一與目自築室於萬竹中晏坐焚香泊如也未耆而歿人

共惜之所撰有綠雲寮詩草人比之韋蘇州子二
長祕閣公燭次衛尉寺丞燿

迪功公

諱森

字與茂苦志力學寧宗慶元五年年三十

九年始登進士高第補揚州文學擢迪功郎監潭
州南岳廟父知寶慶府致仕在家時年七十獨公
一子遂乞歸養承懽竭力事寶慶公者十五年親
終服除公亦老矣不復仕宦兄弟中獨公最貧徒
富圖書古玩亦享高壽

莊定公

諱焞

年十九登寧宗嘉定元年鄭自誠榜進士

文簡公登紹興戊辰嘉定元年亦戊辰科也初授
山陽法曹即今山陽倅海陵叅東淮制幕入為軍
器監簿遷太府丞檢詳編脩擢司農少卿總餉淮
西除理卿出為福建帥改沿江制副召為祕書監
繼大父為侍講兼直院出知太平州州亦大父舊
治也召脩史進侍讀權工部尚書繼大父為禮部
尚書丁父兵侍公憂服除召拜內翰端明殿大學
士提舉祕書省提綱史事封毘陵郡侯凡十年致
仕時甫六十有一優游于家者二十四年而後終

公少達老榮久歷于世其事行甚多門人趙探花
達甫君發感公教育之恩著尤端明日歷十一卷
其文淳其事奇鏤板至今盛行于天下故不復贅
文簡莊定二公繼文獻公任三事祿入益厚晉江宗
人歲歲來覲皆厚貲以遺之莊定公晚年捐積俸
買田十二頃于晉江以贍族之貧者事詳晉江人

張明誠贍田記

事詳閩譜

刺史公諱棟號率齋學最早十歲通五經十五已開萬
卷矣善為古文累舉不第至度宗景定三年始登

方山京榜進士令山陽不樂吏事告歸薦補州教
授召為秘書正字不能佞權要出為廣德刺史致
仕家貧享大耋清福二子燾照皆仕不顯而博學
有名當是時江南郡邑金石文章皆其父子之筆
至今石碑布滿諸處本邑中更多刺史公年少于
莊定而叔行也

祕閣公諱燾弱冠時讀書於九龍山第五曲愛其中喬

松數十株即其中結精舍舍後築小閣山林清景
咸備一日松下忽湧大水橫流數日不止公下視

之有一眼即命山人穿之深五尺而水泱泱清澈
汲以煮茗與二泉無異也遂以石甃之自號松泉
生公後致仕家居亦常居此精舍松益老泉益清
公甚樂之事詳蔣嗣梅松泉精舍記公既老有末疾亦養疾精
舍中一日汲泉忽臭味達于戶內公甚震驚及夕
而泉竭不半年公亡矣

朝廷每大慶必推恩於大臣文獻文簡祖孫各經推
恩數次往往力辭然中亦有不能辭者文獻公以
上四代莊定公以下五代無一人不沐朝澤列冠

裳

寺丞公諱太常博士公仲子字仲微生世祿家而好

藝文既長益習經術其業遂為江南士子心服久
不登第及門受經諸生歲以百數公選其最貧者
給食次貧者給毫楮士心益向公既嗣為正平公
子更字宗英年四十始以大父蔭出任仕至衛尉
寺丞即拂衣歸教諸生如故年六十三卒紹定癸
巳也生子將作公諱字公垂資稟最高少與父門
下諸名生切磋十年讀書萬卷性喜為詩有復初

齋詩稿十二卷行世以伯父莊定公蔭授太常寺
太祝擢將作監主簿以詩悟達者去官生子一即
玘之大父也以玘推恩追封中憲大夫同簽樞密
院事中憲公諱字尚之配魏郡君司馬氏生九子
不育者七獨先君亞中公諱與叔氏穎父諱存先
君以玘推恩累進亞中大夫僉太常禮儀院事配
先母魏郡夫人司馬氏生玘穎父公生從兄良器
仕為提刑點檢子即天澤也天澤與君同撰尤譜
終慕公諱山子度宗景定中有名太學素謹厚緘默

有志操晚年堅方謂之節有勸之仕者輒以醇酒
醉之私謂家人曰吾家三百年科第十世冠裳宋
恩渥矣吾何忍失身二姓乎願肥遁終身耳公與
予仕隱雖異跡公真淳厚君子也

跋語

先曾祖大司徒守玄公諱玘致仕還架數十水屋於
萬柳溪上日聚親族談先世事著溪邊舊語三卷
不肖實少侍父味菜翁諱居翁時述其話洪武二
十九年丙子科實幸登鄉書第四名伯兄務朴公

諱文詔 徵孝廉 具牢醴率實祭告司徒公墓大會族人於覺林寺祠屋中求所謂舊話已簡斷墨闇不可讀者逾半命門人許靈就燈下抄其完者以歸恨全帙之不得又數年實佐南昌攝郡篆捐俸刊木傳之子孫

曾孫男實百拜跋

君子之澤五世先文獻公甫三世而文簡公光大之元孫莊定公繼其位源益深流益遠文簡六傳我大司徒公中起名位壽富貴一世嘗著舊話三卷曾從祖南昌公刻之踰百年而板朽從子都給

事中魯重梓家塾予男瑛帥廣又刻之憲臺一歲二板俱行傳之可久矣

嘉靖壬子大司徒公七世孫禮部員外郎晉識時年七十有四

萬柳溪邊舊話終



